

# «Da cuminonza a Ruschein – la sera dils treis»

Igl onn 2016 ha ina grupp d'interess da tschun personas inziau las seras «da cuminonza a Ruschein», ina seria da circa sis occurrenzas ad onn, mintgamai ils treis dad in meins. La primavera 2020, suenter 26 sentupadas, eis ei stau finiu – pervia da corona. Mo ussa va ei vinavon. Dumengia, ils treis d'avrel stat l'organisaziun e la lavur dils pumpiers el center.

«Da cuminonza» vul contribuir ad ina buna atmosfera el vitg cun organiser regularmeins sentupadas che portan informaziun, divertiment, reflexiun e cum-pignia e quei en in spért dad amicabladad, respect ed interess in per l'auter. Ils temas ein zun differents. En las 26 sentupadas vargadas ha ei p.ex. giu num: viadis particulars, catschaduras e catschadurs, fugitivs, la sien, gardists, la mort, noss'aua da mintgagi. Envidadas ein secapescha buca mo personas da Ruschein mobein era d'ordeifer. L'entrada ei gratuita.

«Ei brischa! Tgi stezza?» Quei ei il tel dalla sera dils treis d'avrel. Mo el tuc-ca sulettameins ina part dalla lavur dils pumpiers. Ils pumpiers e las pumpieras vegnan clamai era sch'ei va p. ex. per salvar carstgauns ed animals en connex cun accidents, inundaziuns ni auters prighels digl ambient. Tenor la lescha da pumpiers dalla vischnaunca da Illanz/Glion ein tut las personas denter 21 ed 45 onns obligadas da separticipar al survetsch activ da pumpiers – u da pagar la taxa da cumpensaziun. Hosps dalla sera ein: *Gion Casaulta* da Castrisch, cumandant da pumpiers, *Duri Coray* da Ruschein, meinagrappa el corp da pumpiers e *Rabel Caderus* da Ladir, commembra dil corp da



**Pumpiers en acziun.**

FOTO MAD

pumpiers. Denteren vegn mussau in cuort video che stat en connex cun il grond barschament da 1939 a Ruschein. Duas dun-nas ch'eran lu affons da scola seregordan: *Pia Coray-Jäger* (\*1928) e *Marionna Coray-Caduff* (1932 - 2021).

**«Ei brischa! Tgi stezza». Dumengia, ils 3 d'avrel 2022 allas 20.15, casa da scola Crestas, Ruschein. Dapli sin [www.dacuminonza.ch](http://www.dacuminonza.ch).**

*Per la grupp d'interess  
Maria Cadruvi*